

時之習完安敢復售於今日乎拿鞫定罪○乙丑命選文學之臣賜暇讀書大
提學金瑬以李敬輿李景義李景奭李昭漢尹墀抄啓曾被是選而陞堂上階
者李敏求李明漢李植亦請破格仍存尹墀海嵩尉新之之子左議政昉之孫
也為人穎悟頗有才氣但自少急於仕進處身不似士夫廢朝時父子奔走得
拜說書反正後以門戶勢重複通清顯自若無累者然其在臺閣當大小論議
必首鼠兩端前日鄭蘊之立異仁城之論也墀以獻納出沒規避遂為清議所
棄不久金瑬為銓長又除獻納執義俞伯曾乃彈墀直斥前後情迹及伯曾補
外墀遂拜吏郎而少無慚色揚揚就仕識者尤唾之至是又預於賜暇之列聞
者莫不駭焉○工曹判書申景禎上疏乞適本職兼帶大將中一任 荅曰省
疏具悉卿其勿辭察職○夜艮方巽方南方有氣如火光○丙寅禮曹啓曰曾
有卒哭後服色更為議定之教矣臣等反覆參商則五禮儀大王王后喪卒哭
後視事時用白袍今於期喪仍用白袍似無差等故當初以淺淡服磨鍊者蓋
以此也而今之羣議亦多如此第念五禮儀內喪在先條卒哭後白衣翼善冠
烏角帶自祥至禫深染玉色衣云此則父在為母服也今此期服實倣此例則
卒哭後白袍亦似有據依此磨鍊而深染玉色與淺淡雖不相遠依禮文仍以